

## ADMINISTRACIÓN LOCAL

### PROVINCIAL

#### DEPUTACIÓN PROVINCIAL DA CORUÑA

Servizo de Acción Social, Cultural e Deportes. Sección de Educación, Cultura e Deportes

*Bases da convocatoria do premio "Otero Pedrayo 2017"*

#### ANUNCIO

Segundo o establecido na base 4.2 da convocatoria do Premio Otero Pedrayo 2017, que foi aprobada por resolución presidencia da Deputación de Pontevedra núm. 2017004194 de 9 de marzo de 2017, publícase o seu texto completo

#### BASES REGULADORAS DA CONVOCATORIA DO PREMIO "OTERO PEDRAYO 2017"

##### 1. Convocatoria.

1.1. Convócase o Premio "Otero Pedrayo 2017", dotado con dezaseis mil euros (16.000,00 €), segundo as disposicións do regulamento correspondente.

1.2. Esta convocatoria corresponde ao ano 2017, de acordo co disposto no regulamento, no que se establece o seu ámbito autonómico e o seu carácter anual; convócaa cada ano unha das deputacións provinciais da Coruña, Lugo, Ourense e Pontevedra, por esta mesma orde.

1.3. Atendendo ás razóns expostas, a convocatoria e a concesión do premio, na edición de 2017, atribúeselle á Deputación de Pontevedra, que consignará na aplicación 17/330.3340.481.04 do seu orzamento de gastos o importe do premio (16.000,00 €) mais os gastos correspondentes á súa organización, e no de ingresos, as sumas que deberán achegar cada unha das demais deputacións de Galicia, cotitulares do premio, cunha contía de 2.000,00 €, e a Xunta de Galicia, con 8.000,00 €.

##### 2. Obxecto do premio.

O premio "Otero Pedrayo" ten por obxecto:

- Perpetuar e honrar a memoria da persoa egrexia no campo das letras e do coñecemento.
- Premiar un labor que constituía unha contribución eminente á cultura galega.
- Promover os valores propios de Galicia e as obras que leven ao esclarecemento e á mellora da súa cidadanía e institucións.

##### 3. Candidatos.

3.1. Poderán optar ó premio:

- As persoas naturais nadas ou residentes en Galicia ou con cumprida raizame nela.
- Os grupos de traballo radicados en Galicia ou constituídos para promover a cultura galega.
- As personalidades ou institucións que se caractericen pola difusión e o mantemento da cultura galega.

3.2. A opción ao premio determinarase por unha candidatura, que poderá ser feita por:

- Calquera persoa física ou xurídica das sinaladas no apartado 3.1., respecto de si mesmas.
- As entidades académicas e culturais galegas respecto dos seus membros.
- Calquera dos presidentes das deputacións provinciais de Galicia, a proposta das respectivas comisións de Cultura.
- A Xunta de Galicia, oída a Consellería correspondente.
- O mesmo xurado, xa constituído.

#### 4. Tramitación.

4.1. A presentación de candidaturas ao premio formularase nun escrito dirixido á Presidencia da Deputación de Pontevedra, e achegaranse os seguintes documentos:

- Recensión biográfica da persoa ou agrupación que aspira ó premio.
- Documentos e antecedentes que se consideren de interese para o coñecemento da súa dimensión literaria ou científica.
- Cinco exemplares do texto do traballo co que se opta ao premio, presentados a dobre espazo, letra Times New Roman corpo 12, no caso de que a proposta se basee nunha obra ou produción singular concreta.
- No caso de agrupacións e institucións, un exemplar do regulamento ou estatutos polos que se rexan e unha relación das tarefas levadas a cabo en relación co obxecto do premio.

4.2. A presentación de candidaturas realizarase no prazo de tres meses, a partir do día seguinte ao da publicación desta convocatoria no BOP de Pontevedra.

Esa publicación realizarase tamén nos boletíns oficiais das provincias da Coruña, Lugo e Ourense, no DOG e nos diarios de máis difusión da comunidade autónoma.

4.3. A presentación do/a candidato/a determina a aceptación íntegra das condicións desta convocatoria e das contidas no regulamento do premio.

4.4. Unha vez rematado o prazo ao que se refire o apartado 4.2. a Secretaría da Deputación de Pontevedra expedirá unha certificación das propostas presentadas que, xunto con elas e coa documentación correspondente, pasarán ao xurado do premio, para que todos os membros as coñezan con antelación suficiente á reunión de deliberación.

4.5. A cada solicitude ou proposta xuntaránselle cantos documentos se consideren de interese para o mellor coñecemento do/a candidato/a.

#### 5. Xurado e actuacións.

5.1. Para adxudicar este premio constituirase un xurado integrado por:

- Presidencia, o Presidente da Xunta de Galicia ou persoa en quen delegue.
- Vicepresidencia, a persoa titular da presidencia da deputación que convoca o premio, que este ano lle corresponde á Deputación de Pontevedra, ou persoa en quen delegue.
- Vogais:
  - Os presidentes das tres deputacións restantes, ou persoas nas que deleguen.
  - O presidente da Comisión de Cultura da Deputación que convoca, ou persoa en quen delegue.
  - O conselleiro de Cultura da Xunta de Galicia, ou persoa en quen delegue.
  - Un representante de cada un dos seguintes organismos:
    - a) Universidade de Santiago de Compostela
    - b) Universidade de Vigo
    - c) Universidade da Coruña
    - d) Real Academia Galega
    - e) Instituto “Padre Sarmiento” de Estudos Galegos
  - Cinco persoas de recoñecida autoridade científica e literaria, designadas pola Xunta de Galicia e de cada unha das deputacións.

Procurarase a paridade de xéneros nos membros do xurado.

- Secretaría, con voz e sen voto, o secretario da Deputación de Pontevedra

5.2. O xurado constituído emitirá o seu ditame no mes seguinte ao día no que remate o prazo de presentación de candidatos, e a súa actuación suxeitarase ao disposto nos artigos 4.2 a 4.6 do regulamento do premio.

5.3. Da actuación do xurado e da adxudicación do premio redactarase unha acta detallada que, asinada polos seus membros e coa totalidade das documentacións presentadas, pasará a coñecemento do Pleno da Deputación convocante na primeira sesión que teña lugar.

5.4. A copia da acta e dos demais antecedentes que cumpran para o coñecemento da tramitación do premio remitirán-selles ás deputacións da Coruña, Lugo e Ourense.

**6. Entrega do premio.**

Realizarase no lugar e na data que determine a presidenta da Deputación de Pontevedra, nun acto solemne e coa asistencia dos membros da Corporación provincial e do xurado, así como de personalidades das artes, letras e ciencias da comunidade autónoma.

Xunto co premio, a persoa galardoada recibirá unha copia da acta da reunión do xurado.

**7. Normas supletorias.**

No que non estea previsto expresamente nestas bases, o xurado e a Deputación convocante terán en conta as normas contidas no regulamento do premio e nos xerais do funcionamento da Corporación provincial.

A Coruña 3 de agosto de 2017.

A presidenta en funcións da Deputación da Coruña

M.<sup>a</sup> Goretti Sanmartín Rei

2017/6762

